

卷一

紡授堂集卷之三

詩部七言古

閩會異撰弗人著

九日

我有好詩一萬首
携向人家欲換酒
言辭未拙拙叩
門行行無之虛重九
掀書三徑不須開
一卷陶詩素
心友陶潛籬下採
黃花我不愛花愛
五柳黃花寂靜
老籬邊楊柳風前
大放顛

麥熟歌戲張二松

誰家兒矜狂癡朝也書暮也詩貯粟瓶蛛交絲鼠子
移家住甕底婦呼何怒兒苦饑孔孟饑凍之嚙矢開
箱索卷欲焚之婦無悲兒無啼阿翁釋卷學灌畦南
山綠浪麥離離老雉穀穀呼晨炊三月正當麥熟時
小麥滿筐大麥滿箕小麥釀酒大麥糜麥槁燃薪麥
寔米蒸黍燥脾烹伏雞全身浩蕩沒酒池婦歌烏烏
兒跳嬉婦媚其士兒呼爹老農之樂今乃知嗚呼噫
嘻老農之樂今乃知早不負耜事鋤基諄諄然孔氏
之學而

東邊日出西邊雨

東邊日出西邊雨東邊花好西邊苦西邊涉蟻啼東
邊乾鷗笑也莫笑也莫啼東邊日過西乾蟻升封柳
濕鷗

高蘭引

清齋高蘭高入雲蘭旗揚揚招雲君雲君出雲踏龍
來紫莖縛篲掃塵埃掃却俗紅千萬品編蘭爲席蕙

爲枕深蘭光露流滿觴留君蘭間十日飲

戲張二松

弗人詩二松酒不甚高趣則有飲不論雅俗吟不問
好醜那管醉無醒無心垂不朽劉伶未忘骸李杜亦
敝箒弗人淨二松丑騷壇麴社吾戲場隨意登場齊
拍手

送施辰卿遊雁蕩

閩人言山尊武夷君昔遊蜀登蛾眉試訪雁蕩浙江

西三山較之孰更奇爲予仔細一評之無爲成說定
高低繇來山水待相知康樂風流繼者誰康樂遺踪
世其追自携雙眼欲何爲名山定論待新詩知君不
爲名所欺

放歌示薛汝儀

爲人不能使人愛爲文不能使人取知我猶有薛汝
儀時時勸我無復爾我非有意愛人憎強勉逢世顏
有泚我今且學之愿面買歡喜我今學爲應世之文

章濃脂厚肉多且旨我今換却翫體之頭顱步步折
腰笑齟齬汝儀乎汝儀乎女應不願我如此不願我
如此安得世之人盡如吾與子

吾客木侍居三年去之而未有詩主人薛汝儀
氏以書來責予詩逋走筆答之山居舊名石
可予謂山中之石未有可者題曰木侍取古
人閒居草木侍之語也

福廬之山皖而佞靈岩稍清卑而隘二山偶爲世稱
賞粗沙凡石也堪拜登臨貶我佞時名山水之間亦
世態我來遊山異所聞山下一園差可愛一園萬木
娟如眉稍爲山間開壟贖園中又有佳主人晨夕能
與我相對天下名園不可得半在主人半在客主人
善醉客善狂慢罵愿山奴俗壑與君簡較衆木中花
有典刑樹有格手種蓮花百尺高栽松未老亦典則
千樹夭桃佞佞花半供使令半刪斤衰蘭瘠瘁礪石
間有時作詩慰落魄麗園宜春我愛冬卧雪梅坪坐

竹栢深春花煖磬聲香亦賞其韻非以色三年草木
侍吾居一房當柳臨清渠對此如何不作詩別來衆
木應相思

問劍

匣中尺劍夜夜吼不報恩仇不屠狗劍氣昏昏似病
人欲沒不沒數星斗我欲開鞘再重磨其奈無人可
贈何

贈楚荆醫人張達可

荆州自古英雄地楚有儒者荆門至盡讀人間未見
書軒轅素問資遊戲我非杜老年未衰長年高枕亦
病肺當其氣激火炎時有似三分互鼎沸盤胸扼吭
據孫吳心腑之間角操備火攻水戰策紛然諸葛周
郎竟誰是楚人談笑立奇功一劑排之水火濟伐病
居然當大敵擲却方書出奇計驅使草木如驅人參
苓俱帶英雄氣

薛朝敵餉我梅醬走筆答之

寒歲灞橋出高手欲折梅花春釀酒熟梅作醬意近
之門士餉予當紅友食梅猶似記花時樓西小窓雪
浣眉梅花難寄醞梅子遠莫致之共所思

題清壑餌芝圖爲施逸仲君壽逸仲爲吾友施
辰卿忘年之交吾亦因辰卿而友逸仲也

人生不得行其志雖生百年猶爲夭吾嘗以此論高
壽期願者多壽者少於我逸仲乃得之年未及衰稱
逸老少年名士老未售向人不肯說懷抱繇來才子

失路悲盛壯雄豪衰潦倒逸仲意中何曠然少則春
華晚秋潦老當益壯窮益堅蹠躩是翁亦喪寶詩書
肯作逢年具不待至今飛鳴早我寧願爲瘦地窮谷
之寒柯不願爲糞壤肥田之小草一壑足宇芝足糧
文福數奇清福飽世人食芝如食肉口齒高香心腑
俗至人食肉亦餌芝肥梁刺齒等樂饑世人潛壑卽
入市凡心摧山作平地至人廛市自幽壑貧無所求
老知足門外有車容之無屋座上有客享之無粟我

家有書十萬卷父能教之子能讀多富多壽多男子
與之不與隨造物飯松衣薜巢神仙我學退之自世
間以此爲壽觴四筵坐客笑之君謂然客中唯有施
辰卿舉一觴曰誠哉言

山竺有衰蘭數本瘠悴糞壤間余心欲護之而
不能爲力是余之過也偶見膽瓶中插新蘭
一箭皆蓓蕾未成花余哀其莫爲愛護方其
穉而傷焉歌以閔之亦以告乎士之強作花

癖者使知花事與刈麥殊科無徒以銍刈自
附於瓶史也

風吹蘭芽芽初茁一箭十花未開一丸畹嘯聚劫花
賊不問花時亂摘折譬如草盜掠香閨不待十六與
十七世間那有賊風騷但有淫行非好色又如水米
聲未叟盜甕村翁舖甕脚如此安得稱酒人不知其
味徒舖啜可知清事屬雅流俗人學雅增醜拙移文
俗士莫愛花名爲愛之寔花厄願言坐卧守花間惡

客防掠婢防竊新蘭漸與秋風深蘭旗插天高孑孑
題柯無瑕畫

高溪懸山樹尾吼割山負石老樹走危峰牙牙山腹
中趨而避之立溪口何人可以置此間千仞岡頭一
狂叟我將呼曰柯無瑕手中尚欠一杯酒

客中送春

春風與我俱作客携我舟行春水碧二月三月共客
中四月同歸不可得世間何事最愁人草滿花闌客

送客

其二

春風故把濃花掃留待新年正月好何似休貪新歲
新省得今年一回老留春不住聊送之遠送于野歸
來遲春風揖我謂我別留將一片梨花屑

客石巢五日

吾笑昔之爲賦以吊三閭者猶享海人以乾
魚而脯鹿以餉山客也

節物驚人客心覺菖蒲上門黍生角欲尋舊事招古
魂荒船龍卧鱗甲剥山深水淺魂不來把酒讀騷與
勸醉英雄節義無文章垂世猶之虎豹鞞龍逢比干
傳者稀麥感薇吁國風格孤情獨醒以爲文風雅頌
詩等醉濁千古風流第一人騷賦門壇楚囚作宋景
述子賈馬孫毅魂呼之衆曰諾才子盖代相豪誇作
者張羅繼者縛孤高文人羞餽醜應耻後來啜其粕
特舉一觴揖鬼雄餘子護壇前且却傷心不忍慟懷
沙把其文章以相樂

今日喜作詩偶於篋中得友人索書董箋試筆
書七字其首信手足之喃喃然遂不覺滿紙
兼寄董子叔會韓子晉之憶數年前亡友表
亦人謂予子文不如詩詩不如字然則無法
者勝也然乎

松江董家雲母箋十帙一束百文錢猶勝案頭塗惡
札爛墨冗筆斜可憐吾鄉草聖鄭善夫外孫陳勳頗

肖焉先後之間吳文華述祖懷素兄張顛邇來雄俠
張閣老鴻筆如帚欲掃天敵以高閒深而秀筆帶佛
相曹學佺抵掌賀監莊奇顯細不能大亦鮮妍吾見
其進林中書惜乎天不假以年吾友韓錫善古文石
闕畫指竹書鉛董子養河老禿翁髮短手幼妙娟娟
二子謂我太無賴胡不能正鋒用偏我聞斯言謝不
敏蘭亭古蹟翻未全書皮扇面爛紙尾意在取適非
必傳當其縱筆無所本我自讀之難竟篇學醫費人
書費紙安能如此拘拘然唐碑晉帖鄉古獻讓子與
之相後先

雨

深春渴秧兒失乳官督老巫代秧歿肉食祈天巫翔
舞薄言往愬逢彼怒四之日雩訖三月風雨或與人
意遇寇蓋紛然謁上帝日天雨粟繫我故去年海上
賊捉賊臣日我武飛露布 謂鍾捉李

薛會母挽詩

我聞昔人之言曰君子日終小人死死則宜吊終宜
賀孺人女中之君子孺人何以相其夫老擲烏紗遊
鹿豕孺人何以教子孫曰士之子恒爲士登母之堂
遶素幃林立孫曾餘百指古來七十人生稀母幾百
歲少一紀卽使母自爲造物所以自置寧過此戶外
弔客掩面啼母應笑之何乃爾前山深壑魂來遲楚
些俗聲夜洗耳

林履卿花燭詩

吾門之中三林子伯吹履卿與鼎甫三子少年天下
士閣筆春山待辰女伯吹佳期清明候正月便思寒
食雨山居二月至十月居內半續鴛鴦譜昇甫花燭
十月初七月八月學歌舞十客扣門九不開花窓折
花調鸚鵡熠熠文鸞呼竹間挈雲高鳳不肯舉履卿
車牽後兩生一日感發之初五前此三十初一日屈
指佳辰近可數山中相對閒閒然柔情不肯上睂宇
丈夫不爲兒女歡乃能不受兒女苦盤盤羞作池中

鴛翔翔出戶龍與虎高筆橫架五岳巔安能屈曲效
眉嫵雙玉高花紅燭中催妝之詩爲此語座客曰惡
是何言誰首肯之吾與汝

王子催粧詩

時予有石巢之行

渴蜂憶新葉未香魂遶藜有士三十餘自稱曰梁鴻
伸足示月老乞我一牽紅必得蓋代姿才兼與我同
城市不可得求之村落中有女十七八隱居郭之東
待年讀三易不嫁占春風王子晚得之未娶先情癡

才子矜佳人賣畫買新詩佳期三月前嗔我催粧遲
對客指書空學畫八字眉鴻筆寫細翠老畏不相宜
正月換桃符招婦貼門楣正月花筆鮮邀壻共臨池
正月漉春酒雙面沉一卮正月剪春燈芙蓉燒竝枝
王子乎催妝之詩題滿屋雪老鶯初春睡足我方別
子出門去春江明花照獨宿

客以日月兩輪天地眼索對阿昕以風雨十條
雷電鬚應之口號自嘲或謂我譽兒也

我家阿昕年八歲弄筆杜撰七字對嗔我乞與墨紙
澁更惱先生梨栗貴風雨鬚鬚雷電鬚摸着雷公三
尺喙比我四十而無聞如此後生亦可畏

武夷春旭圖歌爲建州吳兵使壽

代

九曲深溪春雲裏山腹玲瓏出山尾正月漁郎吹洞
簫薜眼未醒寐春水中藏換骨古靈丘仙人成館鶴
成市前有王子騫後有白玉蟾張子一呼仙二六希
夷破夢日三千武夷山君幔亭主春滿壺中集仙子

玄龜膾細白鹿脯鮮二姑拍手玉女撈絃袖中弄出
赤彈丸酒闌一擲飛上天煌煌東方紅玉然千尺龍
燭爛華筵晶晶日出春桃娟灼灼華明上鬢邊武夷
主人笑語誼云是秦時拋核聊記年二千餘歲開未
全曼倩小兒偷不得呂政劉徹空流涎仙子催花動
鼉鼓三姑停歌玉女舞須臾控鶴仙人至口能出雲
雨可致群仙笑謂我有使君沛然能作霖母爲作此
逡巡雲雨兒戲之小技無恩乃公我且揚觶葫蘆自

倒春未深三十六峰杯底翠紅輪投轄駐山中招日
酣歌且停轡

送潘昭度先生擢藩江右

公湖州人以河南學
使觀察閩中

半壁天下開兩目彭蠡震澤君百谷茫茫大江挾漢
流蜀頭吳尾荆楚腹三江經紀吳東西流漱越中舒
百足出納彭蠡具區中巨口噓之如細瀆當以異人
雙巨眼二壑坳中瀉兩盞經綸節義文章兼於人未
嘗許以膽孤高少年立中朝嶽嶽強項不可俛帝曰

中州天下樞以公宣鐸作之師炎海鯨吹海波搖斷
斷持斧來臯陶大江以西控三楚鎮以方岳帝浴汝
洪都藩鎮連武昌滕王危閣騎鄱陽明之彭蠡漢垓
下天鉞斷蛇真龍翔後此鄱陽攬龍子大儒按劍孽
龍死二百年來龍戰場莽蒼宦游今子長蒲日近事
千古意吾代何可無史記大川濡筆名山藏彭蠡之
中峙康郎天日具區不肯許日公挺生我地主公謂
名山且莫爭傳之其人日曾生小子何敢與于斯入

山且讀十年書

讀兩生菽有序

崇禎六年冬客遊福廬吾友施辰卿以其長
君大昕文見示方生宜闇亦因吾社施有敦
以文來質走筆書此吾讀今人文章每得一
美子未嘗不太息痛恨于王半山也吾門有
張子可標者亦以此示之

詞賦壯夫羞不爲而况區區事訓詁英雄氣短無柰

何一半從今半學古史遷班固大文章踏足僂行循
八股安排垂臂削鼠肝焉用丈夫力如虎三百年來
王制嚴糊目經生無所覩青苗剝肉未糊心不過當
時小民苦帖括封錮天下士甚于坑焚王介甫志士
強顏負起哀區區聊復齊變魯我今屈曲鬢成絲安
置此身何處所一時出處千古名二者計之十去五
老牛跼踏觀快犢兩生奇文燈下讀大昕崎嶇縮鴻
筆士元百里抱案牘方生手幼心清妙慎勿過求彈

古調暗啞叱咤亦自喜逢年則迂曰張子

客玉田鄭體乾餉我其家季卿書扇支提茶程
君房墨基奩梳合彘肩肺肚八物予受其墨
茗扇梳合走筆答之

客帳煩雨朝未已蒼頭叩門餉八簋鄭子手啓書滿
箋持向牀前睡驚起生平不曉看圍棋與我奕具非
所宜短髮雙梳缺數齒裹以惡帟爛書皮檀香合子
斑竹筴雖不相稱試櫝之我聞季卿人慷爽何以臨

帖稍病肥結客無家今已矣把扇親如新相知支提
山茗程氏墨鮮如雪白古漆黑病肺老饕釀作賊沸
雪搜腸戰必克洗硯試筆句未來磨墨湏之未可迫
生致彘足及肺腑客處不設爨與釜寄之庖人非敢
辭我欲大嚼自過汝

題松石圖爲張肇宇前輩壽

髯樹耆根羞附土負天高棟石斯礎古鸞族居葺牖
戶千人萬人避風雨視蔭百草凍不腐撐日扶月互

隱處怒龍撼空騎蹲虎雲鬣霧毛相仰俯箕踞科頭
無處所羽客盤桓不敢撫卓卓霜傑誰與伍張子阿
翁曰擎宇

豫章署中送羅無美燕游兼柬社中周子立

我來豫章如處女窺樊野鶴枯足鹿滕王高閣彭蠡
湖愁坐相思去盈尺衙齋揖客軒軒然驚見故人羅
無美儒冠半舊青袍鮮我笑謂君安有此君云鬱鬱
鄉里中大翻安能逐鷄起我今一上黃金臺神龍出

雲壑先徙子虛詞賦帝京篇當世大人雷轟耳丈夫
五十名未成安用王侯空倒屣富貴吾徒自有之肯
向交游乞牙齒長安車載進賢冠子但易之以糠粃
無美乎無美乎我不患君不青紫我聞朝中有君而
無臣惜哉遇此中興年少 聖天子公孫曲學稱大
儒何如海上老牧豕吾友周郎今賈生爲言遲我歌
燕市

題松石圖爲余玄同前輩壽

長松吾欲與之語古石吾欲與之處當世所謂大人
先生者高風典刑未必爾下有虎鳧松光起玉生其
中石之子天地日月煉其髓千年萬年長如此

醉中放歌呈施辰卿時有約同遊福廬作此詩

崇禎癸酉十月十三燈下也

海天寒館風作威指冠短髮不受吹老生未肯自稱
老知我已非少年時君少於予纔二歲四十封拜亦
既遲况俱失路鄉里中子猶豪健吾已衰相視高歌

莫懷古丈夫不能與世違喙長三尺何處開蹙縮眼
睚鬚鬚眉我學蠅聲控舌語世人聽之曰太奇我欲
作賊賊不可爲我欲登仙仙肉重難飛我將爲今世之
文士今世之文觀者舉肥作者救饑瑣尾而不可垂
茫茫千八百年間龍門大筆繼者誰英雄醜殺醋甕
底神龍失令醯雞欺白登鐵城困龍隼不藉巾幘難
解圍我今騎王半山之拄杖借朱夫子之門槌望門
敲磚拙言辭于嗟乎日長的短矢往正移乞巧柳子

送窮退之送之不去乞不來七尺一半土中埋談深
不覺歌自哀尊中酒空淚滿盃明朝觀海共登臺百
尺天門眼好開酒坐莫有少年客白鬚老生狂不得
重遊靈巖走筆示得之和尚時予病背未瘥也
仙佛常住之師友山川無壞之吾廬松花不水旱之
田竹子不耕種之蔬我雖別此將十年丘壑于我未
相疎山僧應老而不老我年未衰雪滿顙長松喜我
去復來盤濤作聲相歡呼禪和嗔我老頑皮金刀爲
我割霜鬚我今長與仙佛居拊我病背金臂舒夜來
作癢搔麻姑

讀魏武詩

其人爲霸則有餘其詩爲帝非不足大風之歌秋風
辭祝之魏武竹弟肉數千年間魏有唐杜甫曹操相
低昂白也慷慨孫郎比東西爭帝將雁行虎踞龍盤
天子氣曹魏終有并吞勢少陵野老目無之大聲不
肯引車避

九日陳道掌昌基李元仲余賡之小集紡授堂
續印帖之十七章也 有叙

甲戌九日四子集紡授堂時昌箕賡之罷公
車歸也李子又買舟還汀水矣蘇子瞻云人
生惟寒食重九不可虛擲四時之變無如此
者寒食之變而勾芒也大夏也變而之昌明
者也重九變而寒沍凍涸矣黃落矣今文章
之變得無類於是乎哉夫已食芻豢者難于
食菽今得氣之文非直菽也殆強人以茹敗
醬食糠覈矣程明道曰新法之行吾黨爭之
太過亦當兩分其咎自厚而薄責強忍而不
爭是所望于今之善變者吾黨則何以處此
也某并識

杯無茱萸徑無菊深巷無山舒遠矚席門折簡遲友
生小摘霜芽飯脫粟蕭條寒話過重陽主人乃謂能
免俗四壁附耳聽小儒大言振瓦破湫屋文章力與

天人爭在山爲嶽水爲瀆何似卑阜狎跛羊畝澮利
揭鳧可浴焦釜晨炊涓涸泉十尋縷探一尺谷索綯
甕嫗何皇皇寒汲還將百尺續秋士窮老未懲心燕
客別餘雙捫足相看失職送將歸游子還遲客去速
甲戌秋林挺甫五十初度效白記年吾少挺甫
六歲誕之辰後十日也

陳亮五十始登第落拓林生未得意屈指君如陳亮
時老猶未遲後三歲眼花秋室呬蠅聲安排排訓詁
小試蒼頭折柬謂我曰九月十二初度至更謂爾生
亦是月似憶其期至耶未因君問我方憮然我生之
辰不欲記蒼茫忽覺十日間老來迫人何處避一時
千古事如何人生有幾四十四雖云社齒以肩隨拈
鬚比君白數倍

劉薦叔以河山九潭誌索題歌以答之

未至其地咏其勝譬則於人未同言好以文字附山
水亦等餘子趨龍門名山大川惡夫佞知己必在神

氣接吐吞未許草草未識面徒以酬應文章相攀援
曾生幾乎把臂失劉子豈無一時千古事可論山更
水換天地死古來我輩人長存何必隨聲載筆於河
山拔地之秀削與夫九潭高水之潺湲或云山水以
人重或云人與山水傳我今逢君豎雙眼大瀆一勺
嶽一卷一丘一壑姑舍之未足展踢翻鸚鵡之脚搥
碎黃鶴之拳區區洞山誌可焚十千巨觥三寸燭吾
爲子歌壯游之新詩爾爲我誦平生之奇文

送右伯申青門師入 賀崇禎七年冬也

皇帝元旦開九閭八年新政敷明堂蹒蹒金鳥來萬
方如日之升依明光闔南牧伯方束裝有士五載居
門墻送行感時涕淚滂指冠壯髮不能長欲行無車
渡無梁尺二頭巾裹深霜于嗟乎今世雖有孔丘之
道管仲之才司馬子長之文章不能安章排句事科
場出疆無贄徒皇皇白身且慢言一匡史記姑俟名
山藏我觀古來多事秋俊傑車載而斗量卽我 高

皇起一旅從龍如雲相翺翔何乃今日 聖人年少
問未央英英側席四目張腹心手足視茫茫吁噫嘻
舉朝之莊莊無一士之可王天下之猶猶無一生之
能狂生今不敢高論乎農黃救時卑之言富強 帝
京胡馬春放韉自來自去何洋洋輸邊千萬求倉箱
數入未聞驚大創秦晉燕齊周楚鄉行屍揭竿驅流
亡三吳人心如沸湯誰益薪者勢漸猖決川導火未
可忘滇蜀黔粵介蠻荒有金如粟馬如羊蝨賊剗肉
憂成瘡汀贛蜂結山作房一窠飛螫四省忙閩浙粵
東岬海防尺澤之鯢亦缺斨 帝謂不勦波屢揚數
撫誨盜胡可常公今觀時中感愴入對我 后昌言
颺 天子曰都留 帝傍元首明哉股肱良天下加
額須平康閩人夢思親繡裳同我婦子怙甘棠
爲老功曹而能醫者壽

人生不爲宰相則爲名醫宰相可以治天下大醫起
人之顛危獨有寂寂老書生糜棄歲月無所爲著書

白頭秋室中草木之年記者誰似君橘裏介眉客傾
杯倒甕填軒墀上自大人先生者乃至里巷諸旄倪
謂君有年彼有命二者脩短數相隨各欲自與以鏗
聃願君亦與鏗聃齊人之祝君以自爲君則自祝爲
世需彼此懷中意相反兩願併爲一期願蕭何造律
能殺人君文無害人舒眉乃知烏喙猛毒藥仁人用
之如餌芝如君斯不負齒髮驅使草木天不違我不
乞君肘後書我不借君竹杖騎左手勸君酒右手捋
君鬚但願君壽百千歲舉夫百千歲之人而壽之重
曰橘中之千歲翁今爾尚憶天下事曷出而爲蕭曹
之事業隨爾百里之寄一命之司而沐浴千萬衆之
呻湯吟火於浩蕩無際之上池身不得爲漢丞相惜
乎爾生不遇時

同趙十五張行子諸君小集擘荔卽席口占贈

小鬟祥卿

十四歌兒聲小小病眼看之不忍飽譬如四月擘荔

枝幼色妙香未入口破林小摘挂牀頭一顆綠玉涎
數斗樹頭已老人食新紅塵熱趁一騎走火山燒手
腹果然老饕者多知味少

爲陳惟秦山人八十壽

吾於今世稱詩者未嘗一言題贈之我所著作逢彼
怒彼之所喜我不知惟秦山人老詞客把吾詩卷詫
曰奇笑謂今時之高士俯僂貴游髡鬚眉入門不迎
出不送俳諧焚掃侍琴棋齒縫風吹入官府巢由馬

首跪致辭大蟻升封小蟻聚樹壘負固重插籬高棟
正聲陰韻府塵垢囊中行相隨側肩曳足入朱邸熱
竈附釜舌舐脂識字媒僧有鬚妓伺候文酒兼談詩
李白猖狂杜失律韓愈鬼魅元結癡輕俗寒瘦姑舍
是彼哉中晚體格卑吾徒正宗唐初盛自以爲是居
不疑今之言詩者如此所以老人意不喜八十稱觴
詩滿囊曰壽我者惟曾子我不頌君膝上之孫曾我
不頌君口中之兒齒我不頌君黃花霜鬢能高歌我

不頌君毛書夜眼堪細視喜君能與貴人游不許貴人稱知己喜君難老而能貧手擲扶老走入市龐叟苦吟孫讀書小甌糙米城角寺我聞人言富貴乃吾所自有吾所不知者壽爾如君真可以長年上牀一榻下牀一屣剔牙香殺青菜根摩足未湏赤脚婢不仙不佛老布衣兒視老彭弟李耳

余希之賡之編選社旅誓訖賡之書來告成答之

丈夫何事不可爲而乃區區事訓詁聚歛虫臂編排之爾之所樂我所苦希之四十弟三十頭雖未白唇已腐胡爲乎浩蕩拍浮於章句之中今不成今古非古一代英雄化蜣螂摩詰雲林坊糞土眼中天下事何如八股功効乃如此賡之手書謂我曰伯氏筆耕仲書賈季也不得已而搢搢然瘠硯代食濡渴釜

放歌爲林挺甫節母壽

人可以不富貴有親在而不可以不富貴吾與挺甫

堂上俱有辛苦艱難之節母吾母若母俱老矣而未
有一命以相慰吾母與若母則時進吾二人而言曰
兒不學以爲愧遇與不遇時也兒奚懟於是崇禎八
年長至後之四日林子之母於斯辰也設輓林子則
跪酒上壽而不成醉男兒五十未成名母今七十有
二搢搢然而含蘖哺糜晝紡夕緯林子之母則又進
林子而言曰兒胡皇皇吾能湏爾以期願之歲兒不
見乎夏有蓮秋有桂桐竹不先時而實橘柚不背霜
而翠林子於是再拜長跪舉一觴曰兒有母而不可
以不富貴兒有賢母而不可以不富貴而可以無爭
遲早於旦晚之榮苑瘠瘁今亦不遲矣蓋秋以爲期
勿謂五十孤兒之報母也未

送董叔會偕長公德受國博還朝

時今上以流寇脩省

正月柳眼醒尚眠春水瀾瀾柳繫船有士將爲萬里
別風吹髮短霜滿顛問爾胡爲乎遠行曰予送子官
一羶于嗟董子今祖生吾與爾對牀起舞十有五年

來胡爲遲遲其着鞭中原流血土未乾南北之間蝨
附咽 聖人罪已方求賢于嗟乎董生爾曷一痛哭
二流涕六太息于少年 天子之前胡爲乎白頭落
魄泛子于燕道逢抑揄之鬼大笑啞然董生乎無歸
爾曷投筆焚硯仗劍之邊東剗女直西縛于闐單于
繫頸北闕頭懸不則五嶽名山從此逝散髮于衡霍
之巘箕踞于恒岱之巔嵩峯華頂排闥上天安能俟
婚嫁之畢而後昇仙于嗟乎子臯比父縫掖子乘車
父戴笠快駒追風老騅鳴櫪黃金臺燕三千年老生
過之背負笈董生董生遲我來無爲獨立臺下泣

吾友周亮如贖妓嫁之曾子感其事而歌曰

天下男子之淪落而不得意者多矣未有過而問之
者失路鄉里一箏鬟周子邂逅雙淚灑明珠十斛贖
蛾眉暫借鄰家金屋鎖愛人以德禮明微坐懷不亂
日未可召灼選士湏其人美子剩衾且虛左我觀古
來烈士辱泥中命彼後車載者寡解衣推食間有之

踞廁洗足雜慢罵潔女不坐柳下懷小兒呼將寧勝
下無禮豈如縲紲中收而賤之等拋捨英雄或仁而
猶注瓦我重周郎一片心賤殺江州淚司馬于噫噦
市或估相牛飯青車亦檻霸囚衣赭願將周子明明
如月之肝腸張爲彌天萬日之羅橫九野無使世有
落拓丈夫失意類巾幗琵琶遮面鷓絃啞

有鳥篇爲門士陳子鴻謨之母壽也

陳子有
兄先逝

有鳥有鳥生兩雄大者將母翅繞叢綢牖塗雨戶墜
風小者矜毛養翮自東西翔翔遠志隨所之大者中
道隕矰繳小者朝亦哺母暮亦哺母嚙獵虫臂股橐
芑秬大鳥遺雛黃味哆哆

陳兄有
遺孤

瘖嚙養羞吐膺分

隨抱母出谷餘脩尾

時陳方
移居

彼鳥彼鳥爾非無八表

之奇翼可以橫縱十萬里爾胡不負母上天飯母瑤
池核飲母金莖水千年萬年母無死不則辭母且飛
去啄東海之鼈肝啣北溟之鯤子麒麟細膾白龍脯

母也瘖茶償以薺區區漁佃於蜻蜓之六足四翼詩
糗於沼沚之蝦鬣蛙髀弱肉小鮮瑣甘細旨凡鳥反
哺鷲鷲所恥彼鳥望天刷翎聽雲側耳翩然試翮投
予懷曰待涼秋大風起

紡授堂集卷之四

詩部五言律

閩曾異撰弗人著

晚來

徐徐步草堂倚樹借微涼留月遲燒燭驅蚊早閉窓
鼠喧攻米甕僮斲鬪茶鏑坐覺輕風扇新蘭習習香
孤山塔觀海

塔俯永寧衛爲泉南關鎖

八月遊氛淨升高及此時一山屏郡縣兩岸極華夷
地盡單拳豎天寬四角垂孤城憑麓小寸馬立旌旗

鄒五催教詩

教成方十五恰好壻齊肩我錯新昏過人非二八年
如鶯三月暮纔抱一枝眠安得比雙玉高花紅燭邊

其二

琴書今有助文事入閨情問字親夫子閉門獲友生
夜闌時讀罷茶熟與香清燈下人如玉遲君再一更

福廬石丈

石以側而媚亭亭立獨危丈呼吾豈敢我拜爾爲師

朝市知難住林丘卧不宜但存袍笏意留作漢官儀

鳳巖

佳麗雖然少空山一味清寺何嫌小築石亦喜無名
徒省供全約游稀累愈輕試看金布處盡日苦逢迎

送楊吉騰北上公車

勁隼秋高出翩然毛羽豐劍光猶半匣雲翼已開籠
逢世才應爾達人致不同看花須按轡莫亂踏春風

寄柯爾立兼訊林若梁師

每憶君前歲題箋屢寄予似回無去札近亦少來書
吾有師多病山中問久疎時時相見不漸老態何如
送張一遊武林

丘壑盛名下須經巨眼過西湖聞好景問爾果如何
若以常時尚吾知賞者多悠悠山水意相視一長歌

客樓問梅作一詩別之

客子去何忙梅花漸漸香小樓時獨對幾樹正當床
行李明朝發寒山驢背霜又添一離緒牽掛我愁腸

客中同諸子坐月旱久矣

閔旱客愁中無田亦願豐杞憂分藿肉菜色混英雄
覲舞雩成戲天呼聽愈聾炎陽驕未足夜月暈添紅
久不見山公髯矣

漸老一相晤此回有異否居然僧髯髯添得影颼颼
毛髮殊消長機權見去留到頭髮得盡纔放此心休
浴佛日過法海寺

深巷雨疎疎讀書聞木魚因知近寺梵肯過靜人居

茶罷尋僧去蘭新浴佛初蒲團容定客暫許習心除
董子叔會以詩來許我月夕過謂月樓次韻遲
之

所思十步近病亦懶相求約我先呼月遲君共上樓
茶藏三伏水蕉老一園秋以此同予美猶堪永夕留

客中初度日過卽公

出門無所適于野忽逢君衲引閒行客鴻依失伴雲
伊蒲僧俗共觴政酒茶分不是緣初度偶然一斷葷

林衷石雙壽詩

凌霄豈無具雙雙戢翼眠斯人有隱德其道可長年
明志稱觴澹讀書食報廉自然留與子雲翼已翩翩
方具蒙花燭詩

相識纔童子今朝稱曰夫似因予老大不稱爾歡娛
古有閨中秀居然女可儒玉顏何待問才得比君無
病客

客久不思去病頑不畏頰鼻觀香出入神與茗清新

事佛親高士翻書閱熟人祇於妻子淡贏得自錄身
山居病中

隨意聽山鳥譯之語語新佛前稱揖客花事富貧身
暫寄蒲團上聊觀得病因却非無所見亦畏繫閑人
客木侍居梅詩八首

梅有信

遠樹探十日寒林纔一花細尋香處得暗記某枝芽
梢長漸勝月條空不碍霞盡情看未忍留興立昏鴉

再訪

雖是花猶未高枝已漸開病人扶對雪山意遠親梅
賞不宜多伴看能日百回淡然無酒累時共茗壺來
十四夜坐梅

尚未至林下高枝意已狂竹間如可見松裏亦分光
花重鴉聲白月來人影香坐闌深袖手懶拂兩眉霜
雨後

昨日寒兼雨梅間少一行今朝風未已且及曉來晴

嚴飾矜新沐高香樹聖清出幽乾鵲喜先我選枝鳴
梅閣

山居樓百尺可以卧梅林光薄紙窓透香濃清磬沉
一鴻醒雪客千樹寐霜禽但覺重重白送人寤語深

梅坪

獨有梅枝信時時問不忘一從開至落日在竹西庄
次第風霜月商量韵色香近來無事慣幽賞却添忙

梅花別

梅花底事者臨發向人清不忍折枝去聊爲繞樹行
何能香且已無撩別時情從此幽尋夢家園夜夜輕

又

客以梅爲主出門應別之一筇孤影共雙屐片鴉隨
猶喜及今去何堪見落時幽香遮馬首似問再來期
董叔會七夕初度卽席分韻兼送王周父參軍

之楚

四十子添七吾生稍後之撫杯看壯髮君短我如絲

年閱頻來去人應累合離雙星歡恨并故照手中卮
山居贈定生和尚

伎佛性殊嬾長齋苦不能病人一半死獨客幾分僧
以此山中意對君塵外朋頭陀吾是否搔首髮鬢鬢
山居遲林鼎父不至

霜與月俱好詩成人不來星明深樹透鐘破暝煙開
濁酒市非遠山僮沽未回蕭蕭疎竹裏獨坐獨徘徊

戊辰元日

三十又添八漸於強仕親年開春正立曆換帝方新
貧賤何時已干戈滿海濱詩書衰病裏憂世亦憂身
三月晦前客中同陳聖謀柯爾立招李元仲遊

石巢時有警報

烽火雖云悉山情不肯賒以君貧少累似我客無家
伴已三人共遲於一水涯明朝春又盡試問石巢花
是日阻雨不至

此際登臨少偏予得伴齊關心忙裏事遲友竹橋西

未損雨中興明朝展又携新晴遊更好水滿寺前溪
其二

濕濕巴林垌山行去未停沾花展齒鈍過竹雨毛青
杖倚詩方渴泉添水滿餅風聞從警急聊作沸爐聽

秋日樓居

百尺挂城頭何人許上樓到門山是客當水閣如舟
柳短不勝月蟬譁未分秋索居家寥落甚猶得病相求

芭蕉

芭蕉有何好盡日雨聲留對此無端綠杳然方覺秋
琴停挂壁穩老去逐情羞安得人如月徑來上客樓

清明日李右宜澹生過山中製茶

茗摘友生至藍香竈恰紅雲雷方甲折草昧建茶功
飲必選人共氣將各士同相思君不見只在一甌中
舟行同陳聖謀却憶吾家竹樓

桃花倚店幽未肯入溪流一笠暝牛背雙篙騎水頭
人乘破浪興鷗玩濟川舟却憶城西竹瀟瀟方滿樓

病客山居

客裏又山中無塵但有空石爲常侍者佛作主人翁
病省交遊累閒當藥物功只餘雙鬢在大半與僧同

孤鶴

鶴峻不受黨猶宿懶成窠瞑與定僧兩清嫌一影多
何爲行踽踽自喜舞傴傴擬以於陵子辟纒不似他

其二

鶴態何高簡矜孤舞未降意中群少可吾與子爲雙

行好隨琴侶讀宜共易窓更憐一影白月步立清江

其三

一鶴鳴何意却非失伴號我將師猶立松亦效孤高
選樹如觀主無朋不損毛鶩群嗔獨醒君試共哺糟

山居不寐

習靜晝未覺更深自不同獨醒午夜後一寺四山中
暗記某峰雨細聽何樹風愛他僧睡熟聲殷小窓空

贈慵生和尚

詩者禪之末僧非以此高雲心懶成綺鶴意不矜毛
功滿有餘慧情閑亦廣騷吾師遊戲耳人乃共稱豪
題松石畫

蕭蕭穆清容疎疎筆墨中意孤慵屈曲石簡耻玲瓏
世必秦歟漢生惟岳與嵩科頭箕踞者未許狎高風
客石巢東孺生和尚

秋山如雋神骨秀暝枯禪客以閒相得居之病亦仙
此中寒谷口桂後菊花先那得無僧影時過一水邊

不眠感事

鰲吹海氣昏高浪蹴軍門白日千艘蔽晨星五寨存
貪毆柙出兇蕙閉笠招豚曷以旌降賞材官仔細論

其二

短劔夜拏摩傷時枕上歌兵強招是惠戰敗撫名和
魴跋救唇筍鯨投強項戈疆場臣事畢其柰國威何

其三

愛錢文士癖邊裏有同心大帥懸須價渠魁撫責金

低基爭得食借渡不憂沈莫竊舟中潤揚波海外深
客石巢得伍秉樞書和韻

數行來意外秋士感何長空谷桂成路一龕佛對牀
無端從衆老漸悔學人狂回首十年別山中半偈香
客石巢夜坐

紅燭鬚眉影蒼然不忍看夜蟲親客久饑鼠話山寒
老至著書急燈深認字難如何三十九今歲又將闌
施蒙冲先生挽詩

吾友施辰卿尊人蒙冲先生始爲離大夫有
清政于蜀林下垂二十年近以新命出山卒
于韓藩之司理某哭先生于堂而爲詩三章
以挽之焉

海內方多故林居自不安人思公去蜀帝命爾于韓
大國城宗子王家肅理官空遺袍笏在留作典刑觀
其二

登堂不忍問一問一沾襟旅櫬他鄉製家僮異國音

旌銘帝子誅棺蓋老臣心欲覓魂歸處前山洞壑深
其三

林卧已多時官閒隱亦宜魂游韓土樂人作異鄉悲
何不杖於國留爲王者師通家未見面神想倍淒其
客石巢山寺李左宜中秋載酒相過卽席分得
莊字時左宜有浙西之行

山淺桂成莊更深月也香門槌觴政借佛國酒徒狂
客子歸猶未主人去不妨但存寒歲約言別莫淒涼

客石巢遲李元仲限韻時元仲遊嶺南

四首俱
印帖

不是羈棲久他鄉亦可留師生文父子仙佛病交遊
客思篋竿尾人情酒甕頭歲寒須我友空谷共涼秋
其二

嶺外韓碑在文人載筆留山中好伴去獨客爲誰遊
楓老醉如眼霜深白上頭那能看俗面坐過一溪秋
其三

空山萬木收寒谷一人留未省客何待或云我好遊

澌乾溪縮腹遊倦筆髡頭不敢嫌秋惡嫌予錯過秋
其四

知爾里中少他鄉故久留劍雄羞入室物異喜單遊
此歲不添閏今冬已過頭好來谿上別山尚有餘秋
吾遲元仲有限韻印帖詩十一首已元仲自潮
陽歸至汀水而先以書來語其客况索居之
餘日走韓昌黎故祠中指目相語湯湯大江
在祠址下因有韓亭見懷之作元仲之客爲

韓退之留也元仲之歸爲曾子弗人歸也曾
子弗人之遲遲於此亦爲李子元仲而棲棲
不能去也吾兩人之去留如此則雖有大不
意於世俗者其亦可以已矣於是和元仲韻
復爲詩一章以附于印帖焉

海天何蕩蕩蹙蹙馬頭回韓子千年後閩南一士來
荒祠勤尚友古獻識今才指目堪相語路難且莫哀

九月晦夜

客枕欹無寐風窓偏向松憂眠寒捉虱淺夢醒先鐘
秋去三更後貧憎一歲冬愁心真似繭緒滿又加封

庚午元日

阿攀小女名

侍母失中饋阿攀學薦辛年強身未仕主聖國無人
有賊誰思難何官不患貧爲言當事者可惜太平春
過薛老梅庄送李白生還綏安

有興梅庄去到門心事違看花還未發訪友又將歸
燭盡雞聲涓霜深鴻影微明朝江上客紅樹共帆飛

其二

高士來千里山中卧却宜梅花留與我霜夕坐同誰
木落去帆現溪乾遡水遲小橋寒望遠扶病立多時
哭監利丞廖元真先生

衰世無寒宦君緣宦破家人皆尤產盡天似長官邪
卑以清爲累仁胡壽不加相償賢有後廉吏尚嫌奢
寒夜

欲覺懷人夢寤言四壁聞月窓寒犬醒霜枕曉雞勤

憂集心無地緒分愁有群那能管鬚鬢任爾白紛紛
林伯吹携素秋問梅遲我不至書懷

翠袖梅間好閒身病不宜寒君此夜約憶我少年時
月去霜無影燈親花上睂相思坐達旦待爾寄南枝
林伯吹報我梅信猶未答之

爾問梅無信一尊獨上臺林鴉先客探霜月後人來
莫作看花去聊當訪戴回寒枝慳有意應待病身開

壬申元日

日月棲棲裏安居似陸行舊家三宰相流寓一書生
老覺春光賤貧看年事輕髭鬚從白盡懶共歲華爭

其二

纔惜舊年臘忙過半月春席門深巷雨少婦布裙辛
謂老未成老言貧不似貧女兒癡黠半衣屨共矜新

其三

明聖勤思治焦勞已五年萬方依帝武多難問時賢
山海真安未恩威孰後先太平天子在何以尚憂天

水口舟行

曲曲換溪容舟行雲鳥從爭灘輕櫓勇蹲石小漁恭
駛水兼山走香風對峽衝目前難應接未暇數青峰
春莫同趙十五張時乘小集張大受齋頭試茶

同賦

深巷似寒村招尋喜出門魚浮聽鳥弄花動共琴言
茶品泉兄弟笋香竹子孫春光慳五日恐放手中尊

夏至聞新蟬

瘦島敲還澁高山意始絃新聞來舊友朱夏至今年
蚪語小儒竅鶯言老妓咽清吟誰似爾入耳便仙仙

其二

蟬聽雖幽事群囂却譟人乍聞松下弄輕濯耳邊塵
名士談初試高僧梵恰新欲將桐引擬清露正流晨
開正二日林守一携書過斗中園次韻

開正纔二日選勝便移牀門閉四邊水橋通一角香
寂寥兼雨靜空曠稱詩狂拍拍鷗群白分來几席光

其二

出郭新春雨避人折脚床苔紋親展
幼梅片夾書香
天地還吾老文章讓爾狂
好將千頃綠收作筆花光

其三

携具尋幽去無他書一床
柳嫌通體媚花厭盡情香
斟酌鶯深淺追隨蝶穉狂
南園春事未正好記年光
驚蟄日過守一斗園仍次前韻

掀書引話長倚硯布糟床
雨浥鶯言冷雷驚草甲香

屐遲隨竹遠花靜厭人狂
莫捲疎簾起從他漾水光

其二

出城無健足脫屐便登牀
沾柳輕衣重簪花白髮香
琴平詩險澁奕定酒顛狂
明燭不須秉清池夜有光

徐橋次周中槐先生韻

徐孺子嘗過此橋也在進賢縣

漢代相終始徐橋共圯橋
千秋兩孺子易地一高標
鳥盡仙能去鳳哀隱莫招
至人無近事顯晦總冥寥
循靈巖之左而下及半有壑
或題曰澹如酌而

咏之

潔丘屏濫壑清出意硜硜脉細泉調息飄廉汲定爭
山孤石眼白月正水心平試擲青蓮種無根也自生

其二

涓源不受汲少許何嚴冷定可跣趺對流宜屏氣聽
鶴供濡潔味蟬浴雪輕翎得此纔相稱凡心慢挈餅

山居病中方生宜闍携酒相過

方小字
款君

空山來小友載酒問先生為爾當杯起携予試杖行

病蘇人款款菊澹我卿卿再有林間興何妨趁月明

燈下山妻為予捉虱戲謂予咏之

忍癢此生慣處禪心事違夜寒捫又懶人瘦虱偏肥
敗絮吾相得病身爾共依小奚搔背瞑鼯影觸荆扉

其二

但使減吾病饗餐汝亦微喜無當世務容爾在禪肥
瑟瑟何生事勞勞也救饑却慚餘瘦骨飼客北山薇

同張大全施大昕讀書七松樓

懷古携雙友觀書對七松時文渴字女乾硯輟耕農
柳引將來月烟留欲斷鐘自無田舍客高臥笑元龍
雨中施辰卿來同樓居

我被荔枝惱憑欄不肯紅漢唐千載上風雨一樓中
山限天難大雲忙眼易空半窗今古意坐臥待君同
秋深陳洪仲曾玉立鄒瑞麟瑞足陳石丈張雲
將楊公穀同范佩蘭携琴集紡授堂兼以茗
來試次公穀韻

細菊瘦寒屋巷無秋可尋到門人共茗入座客兼琴
霜氣清詩戶風流暢塵林却慚粗糲王能得澹杯深
咏海外紅鸚鵡之六

慧禽日國東冶日豔衣同共笑嗔花啞擅粧如鏡紅
華夷天地隔聲教羽毛通 聖世來重譯能言鳥在
籠

至後過法海寺爾和禪房同慵和尚次韻
訪衲問梅信閒心不記春蕭然吾與汝同是世間人

祇覺添些髮便如多此身欲將妻肉淡特共佛爲鄰
其二

入寺冬新霽寒輕似早春百年天下事此日佛前人
閒失忙中我病分僧半身不辭來往數家只在西鄰
因問恒如閉關信息仍次前韻

未有梅消息或云天已春此中無腳線欲問度針人
落木觀花事生香見死身四邊泥水障誰是一僧鄰
春日重過爾和禪房因觀種蘭是日驟雨仍次

前韻

乍習山光靜方知錯過春欲尋前日事已是隔年人
爐陷除香味花分減色身晦明從變幻吾共一燈鄰
二月十五夜過法海寺同慵生爾和坐月仍次

前韻

春三病失半并夜准三春一客兩僧影聞鐘倚樹人
茶香勻石氣月鬼在花身靜對聲光滿方知佛有鄰
過芝山寺訪空生達權二公仍次前韻

達公善琴

入塵頭易白訪衲借青春暫得觀真我還如憶舊人
詩書慚佛面天地誤傭身瞑坐聽琴罷聲猶殷四鄰
妙香和尚投我新詩仍次前韻報之

奇情如筍蟄慧茁籜驚春畫指心言手矜聲影和人
易三佛變相詩四偈分身莫以頭顱異同堂謂隔鄰
病中無寐聞法海寺晨鐘仍次前韻

世無病老死譬則卉長春地不長他樹天惟閱舊人
祇應生便已何處有吾身念此省貪怖晨鐘發比鄰

其二

鐘淡烟花氣已深天地春徑來近寺宅先覺獨醒人
頑倚空爲舌聲因聞有身樹頭鷗又醒一枕寂喧鄰

其三

只此消晨夕敲殘歲歲春回頭前日事洗耳五更人
來暫哀偷夢眠清病剩身一鐘孤遠甚特共睡鄉鄰

其四

百草隕霜殺因之歲復春死薪生活燧舊鬼長新人

鷺詔萬錢味鶴矜半李身清奢貪着等減讀穀嬉鄰
其五

正好慙慙寐寒敲睡破春漸生醒後事忙盡夢回人
瞑去觀無眼聞來耳累身似於孤枕畔多此兩邊鄰
其六

老失晝之長驚如耗一春聽餘三萬遍淡過百年人
日月能盲眼山河傳肉身況於吾齒髮禁得苑枯鄰
聞慵生妙香達權過守一晤菴次守一韻因柬

三公

居士園能好春深衆木榮開軒來靜侶觀物說無生
花殷琴言定苔親塵影橫莫嫌委巷俗供佛有鶯聲
丙子秋深陳不盈徐叔亨李元仲小集紡授堂
分得五歌續印帖之二十一章也

劔老試重磨朋來開鞘歌大風吹耳熱時事上眉多
日閣酥街雨簷帷衣瓦蘿滔滔詩興在貧賤柰予何
送劉黃脩北上時徵兵入衛

王事棘如此送君游 帝鄉聊爲分一劔不敢咏同
裳龍臥方辭空駒鳴恰履霜道逢入援者爲語莫翺
翔

乙亥元日未有詩足桃符聯句補之

二毛畏我刪霜滿不容頌勲業旆符裏乾坤里巷間
少開雙眼潔難皺兩眉頑何處安脩尾籠邊問白鵬
虜警息再次前韻送劉黃脩

此去烽烟靜 帝鄉卽故鄉同文新釋褐 聖武已

垂裳蛤剖一胎月鵬輕兩翮霜寒江勤目送北雁共
飛翔

寄董叔會

時叔會從長公國博還朝
其先人亦嘗官國子也

老友能知我胡爲乎遠行成均家作述天下爾才名
蓬髮慚兒子白頭憶弟兄好歸春正及江上耦而耕
多病

多病成輕世無徒省杜門坐頑雌伏子捫懶虱生孫
鞭恕倦蹄影鞍欺敗肉臀恩雙燈下淚滅燭滴黃昏

至夜燈深病吟指影恍惚數千年作者森森立
四壁間不知吾友李世熊枯坐千里外谿上
寒屋今夕作何想也續叩帖之二十五章

名位文毛羽翼之翥國門草韉綠耳稿敝櫝夜光昏
腐竈鑽盲燧騷宗禘雅孫不知誰後死能使古人存

卷一